

Hwn yw rhifyn cyntaf cylchlythyr y capel, syniad a ddaeth o'r Gweithgor Cyfathrebu, un o bedwar gweithgor a sefydlwyd dros y misoedd diwethaf.

Gweithgorau

Y pedwar gweithgor a sefydlwyd yw: Cyfathrebu, Addysg, Plant ac Ieuenctid, a Bugeilio. Rydym eisoes wedi gweld a chlywed llawer o'r syniadau a ddaeth o'r gweithgorau yma. Er enghraifft, rydym wedi sylwi fod yna aelodau yn bresennol yng nghyntedd y capel ar fore Sul i'n croesawu i'r oedfa. Hefyd mae gennym rota o wirfoddolwyr a fydd yn ymweld ag aelodau sydd yn sâl yn eu cartref neu mewn ysbyty. Cynhyrchwyd cardiau i'w cyflwyno i'r cleifion.

Yn y cyntedd mae hysbysfwrdd ac arno lawer o wybodaeth a lluniau o'r hyn sydd yn digwydd yn y capel. Prynwyd camera digidol er mwyn tynnu lluniau o'r gwahanol weithgareddau, ac mae cynlluniau cyffrous iawn i sefydlu gwefan i'r capel hefyd.

Gwelsom ddefnydd o'r 'dechnoleg newydd' yn ein hoedfaon, gyda ffilmiau a chyflwyniadau ar 'Powerpoint'. Sefydlwyd Dosbarth Beiblaidd bob yn ail wythnos, ac wrth gwrs mae Clwb Ieuenctid llwyddiannus yn bodoli hefyd. Mae'r bwrlwm yma o weithgaredd i'w groesawu'n fawr, a chewch mwy o fanylion am y syniadau newydd yn y rhifyn nesaf o'r cylchlythyr.

Ond mae yna gost ariannol ynghlwm â'r holl ddatblygiadau yma, ac er bod y gweithgorau yn trefnu rhai digwyddiadau er mwyn codi arian, mae'n ddyletswydd arnom ni fel aelodau i sicrhau fod ein cyfraniadau blynyddol yn deilwng o'r cynlluniau newydd i'r dyfodol. Dewch i bawb ohonom addunedu ein bod yn cyfrannu o leiaf ychydig yn ychwanegol i'n harfer, fel na fyddom yn ddibynnol ar ewyllys da rhai unigolion, na gorfod cael benthg offer drud yn gyson. Cofier hefyd y bydd rhaid i ni ddangos ein parodrwydd i godi arian i helpu gyda gwaith adfer yr adeiladau (gweler isod). Wrth gyhoeddi Adroddiad y ddau gapel yn y flwyddyn newydd, braf fyddai gweld cynnydd calonogol yn y cyfraniadau, fel hwb i bawb ohonom, ac fel arwydd o hyder i'r dyfodol. **Nodwch y bydd y llyfrau yn cau ar ddydd Sul olaf y flwyddyn, sef 30 Rhagfyr.**

Adeiladau

Erbyn hyn, danfonwyd nifer o geisiadau am grantiau ar gyfer y gwaith sydd angen ei wneud ar adeiladau'r Hope. Y ddau gais pwysicaf oedd i Cadw ac i Gronfa Treftadaeth y Loteri. Bu swyddogion y capel hefyd mewn trafodaethau gyda'r ddau gorff yma a'u penseiri. Mae'r broses gymhleth yn un sydd yn cymryd amser, a rhaid i ni fod yn amyneddgar wrth ddisgwyl am ganlyniadau'r holl geisiadau. Yn y cyfamser, er y penderfyniad allweddol i werthu adeiladau Siloh, doeth fyddai oedi am ychydig cyn gwneud hyn. Wedi'r cyfan, pan fydd gwaith yn dechrau ar yr Hope, bydd angen lleoliad arnom i gwrdd ar gyfer ein hoedfaon.

Trefn oedfaon dros y Nadolig yn yr HOPE

2 Rhagfyr - Gweinidog (Cymun)

9 Rhagfyr - Mr Desmond Jones, Llangennech

16 Rhagfyr - Gwasanaeth Nadolig y plant/ieuenctid

23 Rhagfyr - Gwasanaeth Nadolig yng ngofal yr aelodau ifainc

25 Rhagfyr - Oedfa Gymun Undebol Dydd Nadolig (9.00)

30 Rhagfyr - Gweinidog (9.45)

Y Flwyddyn Newydd yn SILOH

6 Ionawr - Gweinidog (Cymun) (9:45)

13 Ionawr - Parchg E D Morgan (Llanelli)

20 Ionawr - Gweinidog

27 Ionawr - Parchg Gerald Jones, Llangennech

Cofiwch hefyd am y canlynol:

Nos Lun, Rhagfyr 3 - Cinio Nadolig y Capel yn y Clwb Rygbi

16 Rhagfyr Cyngerdd Nadolig Côr Glandulais -Capel y Gopa (7.30)

Nos Fawrth-18 Rhagfyr Parti Nadolig yr Ysgol Sul a'r Capel -
Hope (5:00)

30 Rhagfyr- Gwasanaeth ar ddull Plygain yn Eglwys San Teilo (5:30)

Nos Fawrth, Ionawr 22 -Oedfa Wythnos Weddi am Undeb
Gristnogol - Babell (7:00)

Tymor yr Adfent (Neges gan y Gweinidog)

Eleni, Dydd Sul Rhagfyr 2 yw Sul Cyntaf yr Adfent. I'r Cristion gelwir y pedair wythnos cyn y Nadolig yn Dymor yr Adfent. Mae Cristnogion ymhob man yn paratoi eu hunain ar gyfer Dydd Nadolig. I Gristnogion mae tymor yr Adfent yn amser arbennig a sanctaidd iawn, amser sy'n arwain at enedigaeth Iesu Grist. Ystyr y gair "Adfent" yw dyfodiad. Pan fo rhywun arbennig yn dod i ymweld neu aros gyda ni, rydym fel arfer yn paratoi ar ei gyfer. Yn ystod yr Adfent mae Cristnogion yn paratoi eu hunain am ddyfodiad Iesu Grist - yr ymwelydd pwysicaf oll.

Felly, yn Nhymor yr Adfent mae Eglwys Iesu Grist yn gwneud dau beth. Yn gyntaf, mae'n dathlu'r ffaith fod Duw wedi dod, wedi ymweld â'i fyd. Ond yn ail, mae'r Eglwys yn pwyntio bys heibio i ddyfodiad Duw yn Iesu Grist at Ei ddyfod yn niwedd amser i glymu ynghyd holl linyddau Ei fwriadau dwyfol.

Ond mae 'na ddyfodiad arall yn dod rhwng y dyfodiadau yma - dyfodiad sy'n perthyn i'r presennol - oherwydd bod Iesu yn aros i ddod yn awr i mewn i galonnau a bywydau pobl sy'n Ei wahodd i mewn i'w bywydau. Ydy, mae tymor yr Adfent yn gyfle i ni i holi ein hunain am ein cyflwr ysbrydol. Ydym ni'n barod i dderbyn yr Iesu i mewn i'n bywydau? Fel y dywedodd un Cristion o New Guinea:

"At Advent we should try the key to our heart's door. It may have gathered rust. If so, this is the time to oil it in order that the heart's door may open more easily when the Lord Jesus wants to enter at Christmas time!"

Felly Adfent yw'r tymor am baratoi - paratoi i ddeall gwir ystyr y Nadolig, paratoi i ofyn i'r Iesu i ddod i mewn i'n bywydau a pharatoi am y dydd pan fydd E'n dod eto i'r byd.

Dymuniadau Gorau

Cofiw'n am y nifer o'n plith sydd am amryw resymau yn analluog i fynychu oedfaon fel cynt - rhai wedi methu oherwydd afiechyd a henaint. Anfonwn ein dymuniadau gorau a'n gweddïau atynt.

Hope-Siloh

Cylchlythyr Rhif 1

Rhagfyr 2007



"A daeth y Gair yn gnawd a phreswyllo yn ein plith, yn llawn gras a gwirionedd" (Ioan 1:14)

**Boed tangnefedd dros Wyl y Nadolig
a Blwyddyn Newydd llawn bendithion
i holl aelodau Hope-Siloh**

Enw i'r cylchlythyr

Trefnwyd cystadleuaeth i blant a phobl ifainc y capel i gynllunio logo addas ar gyfer Hope-Siloh, i'w ddefnyddio ar ein cylchlythyr, yr hysbysfwrdd a gohebiaeth yn gyffredinol. Ond hefyd, mae angen enw i'n cylchlythyr ni. Dyma gyfle i chi fel aelodau fod yn ddyfeisgar. Beth amdani? Rhowch eich awgrymiadau i unrhyw aelod o'r Gweithgor Cyfathrebu